

Siunnersuummut nassuiaatit

Nassuiaatit nalinginnaasut

1. Aallaqqaasiut

Aasaanerani nalunaaqutaq pillugu Kalaallit Nunaannut inatsimmi nr. 817, 19. december 1989-imeersumi Kalaallit Nunaata Kalaallit Nunaanni aasaanerani nalunaaquttamik atuutsitsilernissamut pisinnaatitaaneq tiguaa. Pisinnaatitaaneq taanna Aasaanerani nalunaaquttap atorneqarnera pillugu Inatsisartut inatsisaanni nr. 14-imi, 19. oktober 1989-meersumi atorneqarpoq.

Nalunaaquttamut malitassat imaluunniit nunarsuarmi nalunaaquttap ingerlaqatigiiffii suut tamatuma saniatigut Kalaallit Nunaannut atuutissanersut, aasaanerani nalunaaqutaq pillugu Kalaallit Nunaannut inatsimmi isummerfigineqanngilaq. Kalaallit Nunaat inatsimmi taamaallaat aasaanerani nalunaaqutaq pillugu aalajangersakkanik aalajangersaanikkut, nalinginnaasumik nalunaaquttap aalajangersarneqarnerata nikisinnissaanut periarfissaqalerpoq.

Nalinginnaasumik nalunaaquttamut malitassanik aammalu nunarsuarmi nalunaaquttap ingerlaqatigiiffiinik aalajangersaanissaq suliassa qarfiup ”Nalunaaquttap aalajangersarneqarnera” ataaniippoq. Suliassa qarfiup ”Nalunaaquttap aalajangersarneqarnera” akisussaaffigilerlugu tiguneqarnerani nalunaaquttamut malitassat aamma nunarsuarmi nalunaaquttap ingerlaqatigiiffii suut Kalaallit Nunaanni atuutissanersut, Kalaallit Nunaat nammineerluni aalajangersaanissamut periarfissaqalissaaq.

Ulloq 11. maj 2022 Naalakkersuisut aamma danskit naalagaaffiat suliassa qarfiup ”Nalunaaquttap aalajangersarneqarnera” Namminersorlutik Oqartussanit tiguneqarnissaa pillugu isumaqatigiissuteqarput, takuuk ilanngussaq 1. Tigusinissamut suliassa qarfik pillugu Inatsisartut inatsisaannut siunnersuutip akuerineqarnissaa piumasaqaataavoq. Tassa imaappoq, tigusinissamut siunnersuutip matuma Inatsisartunit akuerineqarnissaa piumasaqaataavoq.

Suliassa qarfik ”Nalunaaquttap aalajangersarneqarnera” tamatuma kingorna siunnersuutip matuma ulloq 1. januar 2023 atuutilernerata peqatigisaanik Namminersorlutik Oqartussanut nuunneqassaaq.

1.1. Kunneqarfik Danmarkimi nalunaaquttap aalajangersarneqarnera

Nalunaaquttap aalajangersarneqarnera pillugu inatsimmi nr. 83, 29. marts 1893-imeersumi Danmarkip aalajangersarpaa:

“§ 1. Nunami sumiiffinni tamaginni, Savalimmiut eqqaassanngikkaanni, nalunaaqutaq tamatuma kingorna aalajangerneqassaaq tassaasoq Greenwich-ip Kangiani allorniusat tukimukartut 15-ssaannut seqernup ingerlaarnermini killiffia.”

Inatsit ulloq 1. januar 1894 atuutilerpoq. Tamanna Kalaallit Nunaata tunngaviusumik inatsisip ataaniilernissaa sioqqullugu pivoq, taamaalillunilu inatsit Kalaallit Nunaannut atuutinngilaq.

1908-imi inatsit assingusoq Savalimmiunut atuutilerpoq; Nalunaaquttap aalajangersarneqarnera pillugu Savalimmiunut inatsit nr. 53, 22. marts 1907-imeersoq. Kisianni inatsimmik taamaattumik Kalaallit Nunaannut akuersisoqanngisaannarpoq.

1.2. Nunarsuarmi nalunaaquttamik aalajangersaasarneq (globen)

Nunarsuarmi nunat/naalagaaffiit ataasiakkaat “nalunaaqutaq” pillugu nammineerlutik aalajangersakkamik imminni qanoq ittuunissaannik nammineerlutik aalajangersaasarput. Tassa imaappoq nalunaaquttamut malitassat suut malinnissaat kissaatiginerlugu, kiisalu nunarsuarmi nalunaaquttap ingerlaqatigiiffiisa suut ataaniissanerlutik.

Nunap amerlanersaasa ullumikkut UTC nalunaaquttamut malitassaq, GMT nalunaaquttamut malitassap kingoraartaa, malippaat. Periaaseq aaqqissuunneqarpoq, naleqqersuummik imaluunniit 0-imik aallaaviusussamik aalajangersaanikkut – taaneqartartoq meridian pingaarneq – nunarsuarmi nalunaaquttap ingerlaqatigiiffiisa aalajangersarneqarneranni aallaaviusartoq.

Taamanikkut USA-mi præidentiusup, Chester A. Arthur-ip, piunasaqarneratigut 1884-imi ”Internationale Meridian Konference” USA-mi Washington, D.C.-mi ingerlanneqarpoq. Tassani akuerineqarpoq meridian pingaarneq (naleqqersuut) London-ip kangiani Greenwich-imi The Royal Observatory aqqusaarlugu inissinneqassasoq. Meridian taanna taamaalilluni globen-imi allorniusani tukimukartuni 0-mi inissisimassasoq.

Nunarsuarmi nalunaaquttap ingerlaqatigiiffii assigiinngitsut taakkua Greenwich-imi meridian pingaarneq, allorniusat tukimukartuni 0-mi inissisimasoq, aallaavigalugu naatsorsorneqartartussanngorput. Nunarsuarmi nalunaaquttap ingerlaqatigiiffiisa tamarmik immikkut globen-imi allorniusat tukimukartut 15-it inissisimaffigisussaavai. Tassa imaappoq allorniusat tukimukartut 15-it tamaasa meridian pingaarnermiit kangimut nikikkaanni, nunarsuarmi nalunaaquttap ingerlaqatigiiffiat nalunaaquttap akunneranik ataatsimik siuassaaq (+1). Danmarkip taamaalilluni Greenwich kangiani allorniusaq tukimukartoq 15 malissallugu aalajangersaasimavoq, tamatuma malitsigisaanik Danmarkip nunarsuarmi nalunaaquttat ingerlaqatigiiffiini UTC +1-miilluni.

Taamaaqataanik meridian pingaernerup kitaanut allorniusanik tukimukartunik 15-nik nikikkaanni. Meridian pingaerneq naapertorlugu nunarsuarmi nalunaaquttap ingerlaqatigiiffiat nalunaaquttap akunneranik ataatsimik kinguassaaq (-1). Kalaallit Nunaanni nunarsuarmi nalunaaquttap ingerlaqatigiiffia ullumikkut meridian pingaernerup kitaani allorniusanut tukimukartunut 45-nut aalajangersagaavoq, taamaalillunilu Kalaallit Nunaat nunarsuarmi nalunaaquttap ingerlaqatigiiffiini UTC -3-miippoq. Kalaallit Nunaata (UTC -3) aamma Danmarkip (UTC +1) akornanni nalunaaquttap nikinganera taamaalilluni ullumikkut nalunaaquttap akunneri sisamaapput.

1.3. Kalaallit Nunaanni nalunaaquttamik aalajangersaasarneq

Kalaallit Nunaannut nalunaaquttap aalajangersarneqarnera inatsimmi aalajangersarneqarsimanngisaannarpoq, aammalu maannakkorpiaq taanna qanoq aalajangersagaanersoq ersarissumik ilisimaneqanngilaq. Allaffissornikkut aalajangersarneqarsimasoq ilimanarpoq, tassa imaappoq danskit naalakkersuisuinit imaluunniit Danmarkimi ministereqarfimmi.

Kalaallit Nunaat ullumikkut nunarsuarmi nalunaaquttap ingerlaqatigiiffiini sisamani aggulugaavoq. Nunarsuarmi nalunaaquttap ingerlaqatigiiffia nalinginnaasumik inissisimaffigineqartoq tassaavoq UTC -3, Ittoqqortoormiit nunarsuarmi nalunaaquttap ingerlaqatigiiffiani UTC -1-miilluni, Danmarkshavn UTC +0-miilluni, aammalu Qaanaaq aamma Pituffik (Thule Air Base) nunarsuarmi nalunaaquttap ingerlaqatigiiffiani UTC -4-miilluni.

1.4. Namminersorneq pillugu inatsit malillugu suliassaqarfinnik akisussaaffigilerlugu tiguisarneq

Namminersorneq pillugu inatsimmut suliassaqarfinnut, Kalaallit Nunaanni Namminersorlutik Oqartussanit akisussaaffigilerlugit tiguneqarsinnaasunut, allattuiffiit marluupput. Suliassaqarfiit Liste I-miittut piffissani Namminersorlutik Oqartussanit aalajangersarneqartuni Kalaallit Nunaanni Namminersorlutik Oqartussanut nuunneqassapput, suliassaqarfiit Liste II-miittut piffissani naalagaaffimmi oqartussanut isumaqatiginninniareernermi Namminersorlutik Oqartussanit aalajangersarneqartuni Kalaallit Nunaanni Namminersorlutik Oqartussanut nuutinneqartussaallutik.

Tamatuma saniatigut suliassaqarfiit Liste I-mi aamma II-mi allassimanngitsut, aammalu Kalaallit Nunaata susassaqarfiinut taamaallaat tunngassuteqartut, Naalakkersuisut aamma danskit naalakkersuisuisa akornanni isumaqatigiissuteqarnikkut Kalaallit Nunaanni Namminersorlutik Oqartussanit tiguneqarsinnaasut, Namminersorneq pillugu inatsimmi § 4-mi ammaanneqarpoq.

Suliassaqarfik “Nalunaaquttap aalajangersarneqarnera” Liste I-mi imaluunniit II-mi allassimanngilaq, taamaattumillu Naalakkersuisut aamma danskit naalakkersuisuisa akornanni

isumaqatigiissuteqarnikkut Kalaallit Nunaanni Namminersorlutik Oqartussanit tiguneqarsinnaalluni, takuuk Namminersorneq pillugu inatsimmi § 4.

1.5. Kalaallit Nunaanni akisussaaffigilerlugu tiguisarnerup ingerlanneqartarnera

Inatsisartut akisussaaffigilerlugu tigusinissaq tamatuma kingorna akuersissuteqarfigissagaat, suliassa qarfiup akisussaaffigilerlugu tiguneqarnissaa pillugu isumaqatigiissuteqarnissamut piumasaqaataavoq.

Nalunaaquttap aalajangersarneqarnera pillugu Inatsisartut inatsisissaannut siunnersuummik (siunnersuut manna), Inatsisartuni suliarineqartussamik, suliaqarnikkut tamanna pissaaq. Inatsisartut akuersineranni, Inatsisartut peqatigisaanik suliassa qarfiup akisussaaffigilerlugu tiguneqarnissaa akuerissavaat.

Suliassa qarfik tamatuma kingorna tamatumunnga Inatsisartut inatsisissaannut siunnersuutip atuutilernerata peqatigisaanik, Kalaallit Nunaanni Namminersorlutik Oqartussanut tunniunneqassaaq.

2. Siunnersuummi immikkoortut pingaarnerit

2.1. Inatsisit atuuttut

Suliassa qarfik maannakkorpiaq maannakkorpiaq Kalaallit Nunaanni inatsimmi maleruagassiivigineqanngilaq.

Danmarkimi suliassa qarfik Nalunaaquttap aalajangersarneqarnera pillugu inatsimmi nr. 83, 29. marts 1893-imeersumi maleruagassiivigineqarpoq, aammalu Savalimmiuni suliassa qarfik Savalimmiunut Nalunaaquttap aalajangersarneqarnera pillugu inatsimmi nr. 53, 22. marts 1907-imeersumi maleruagassiivigineqarpoq. Kalaallit Nunaannut nalunaaquttap qanoq aalajangersarneqarsimanera paasineqarsinnaasimanngilaq, kisianni allaffissornikkut pisimassasoq ilimanarluni.

Kalaallit Nunaat ullumikkut nalunaaquttap ingerlaqatigiiffiini sisamani agguagaavoq. Nalunaaquttap ingerlaqatigiiffia nalinginnaasoq tassaavoq UTC -3, Ittoqqortoormiit nalunaaquttap ingerlaqatigiiffiani UTC -1-miilluni, Danmarkshavn nalunaaquttap ingerlaqatigiiffiani UTC +0-miilluni, aammalu Pituffik (Thule Air Base) nalunaaquttap ingerlaqatigiiffiani UTC -4-miilluni.

2.2. Siunnersuutip imarisai

Siunnersuummi aalajangersarneqarpoq nalunaaquttamut malitassaq aammalu nalunaaquttap ingerlaqatigiiffia sorleq Kalaallit Nunaanni malinneqassanersoq. Siunnersuummi siunnersuutigineqarpoq nalunaaquttamut malitassaq tassaassasoq UTC, aammalu nalunaaquttamut nalinginnaasumut nalunaaquttap ingerlaqatigiiffia UTC -2 malinneqassasoq. Kalaallit Nunaanni ullumikkut nalunaaquttap ingerlaqatigiiffia UTC -3 malinneqarpoq.

Taamaalilluni siunnersuummi siunnersuutigineqarpoq Kalaallit Nunaanni nalunaaqutaq nalinginnaasooq nalunaaquttap akunneranik ataatsimik siuartinneqassasooq. Tassa imaappoq, nalunaaqutaq ullumikkut 14:00-nngorpat, siunnersuummi siunnersuutigineqarpoq tamatumunnga taarsiullugu nalunaaqutaq 15:00-nngussasooq. Tamatuma malitsigisaanik Kalaallit Nunaata aamma Europap akornanni nalunaaquttap nikingassutaa nalunaaquttap akunneranik ataatsimik sivikillissaaq.

Ullumikkut Kalaallit Nunaata Islandillu, Savalimmiut aamma Kunngaqarfik Tuluit Nunaat aamma Irland Avannarleq akornanni nalunaaquttap nalunaaquttap akunnerinik 3-nik nikingassuteqarpoq. Kalaallit Nunaat aamma Danmarkip, Norge-p, Sverige-p, Tysklandip allallu Europap kitaaniittut akornanni nalunaaqutaq nalunaaquttap akunnerinik sisamanik nikingassuteqarpoq. Aammalu Kalaallit Nunaata aamma Grækenlandip, Bulgarien-ip aamma Rumænien akornanni nalunaaquttap akunnerinik tallimanik nikingassuteqarluni. Nalunaaquttap ingiaqatigiiffiat, siunnersuummi siunnersuutigineqartutut. UTC -2-mut nikisikkaanni, tassani nalunaaquttap nikingassutaa nalunaaquttap akunneranik ataatsimik sivikillissaaq.

Siunnersuut ilusimisut iluseqartillugu akuerineqassappat, Kalaallit Nunaata aamma Islandip, Savalimmiut aammalu Kunngaqarfik Tuluit Nunaat aamma Irland Avannarleq akornanni nalunaaquttap nikingassutaa nalunaaquttap akunneri marlungussaaq. Kalaallit Nunaata aamma Danmarkip, Norge-p, Sverige-p, Tysklandip aammalu Europap kitaaniittut allat akornanni nalunaaqutaq, nalunaaquttap akunnerinik pingasunik nikingassuteqalissaaq. Aammalu Kalaallit Nunaata aamma Grækenlandip, Bulgarien aamma Rumænien akornanni nalunaaqutaq nalunaaquttap akunnerinik sisamanik nikingassuteqalissalluni.

Siunnersuummi aamma siunnerfigineqarpoq, Kalaallit Nunaanni sumiiffinni erseqqinnerusumik taaneqartuni allani nalunaaquttap ingiaqatigiiffiini allanik aalajangersaanissamut Naalakkersuisut piginnaatinneqassasut. Naalakkersuisut taamaalillutik Kalaallit Nunaanni sumiiffiit ullumikkut Kalaallit Nunaanni nalunaaquttap ingiaqatigiiffiini nalinginnaasunik malinniffiunngitsut, nalunaaquttap ingiaqatigiiffianik atuiinnarsinnaanissaannut, inatsimmi tunngavissaqalissapput. Taamaattoq inatsimmi tunngavissaq sumiiffinnut taakkunungaannaq killeqanngilaq, kisianni nalinginnaasumik atorneqarsinnaalluni. Ittoqqortoormiini, Danmarkshavnimi aamma Pituffimmi nalunaaquttap ingiaqatigiiffiini allannqortitsinissaq eqqarsaatigineqanngilaq.

Naggataatigut aasaanerani nalunaaquttap atorneqarnera pillugu Inatsisartut inatsisaat nr. 14 ulloq 19. oktober 1989-imeersumi piginnaatitsissut Inatsisartut inatsisaannut matumunnga nuunneqarpoq. Naalakkersuisut taamaalillutik aasaanerani nalunaaqutaq pillugu maleruagassanik aalajangersaasinnaginnarnissamut piginnaatinneqarput. Naalakkersuisut aamma tamanna kissaatigineqarpat, aasaanerani nalunaaquttap atorunnaarsinnissaannut, piginnaatinneqarput.

Siuserinnerusukkut aasaanerani nalunaaquttap atorunnaarsinnissaanik suliniuteqarnissaq kissaatigineqarsimavoq, kingullermi 2019-imi upernaakkut ataatsimiinnissamut immikkoortoq 55-imi ”Aasakkut nalunaaquttap atorunnaarsinnissaa suliniutigileqqullugu Naalakkersuisut peqquneqarnissaannik Inatsisartut aalajangiiffisassaattut siunnersuut”. Siunnersuut akuerineqarpoq, kisianni suli piviusunngortinneqarani. Tamatumunnga pissutaavoq, Inatsisartut aalajangiinerannut EU-mi (Europæiske Union) aasaanerani nalunaaquttap atorunnaarsinneqarnissaata apeqqutaatinneqarnera, tunngavigineqarmat. EU-mi aasaanerani nalunaaqutaq suli atorunnaarsinneqanngilaq.

Kalaallit Nunaanni aasaanerani nalunaaqutaq aatsaat EU-mi taamaaliortoqarpat atorunnaarsinneqassasoq, Naalakkersuisut suli isumaqarput.

3. Pisortanut aningaasaqarnikkut allaffissornikkullu sunniutaasussat

Siunnersuut pisortanut aningaasaqarnikkut imaluunniit allaffissornikkut sunniuteqassanngilaq.

4. Inuussutissarsiortunut aningaasaqarnikkut allaffissornikkullu sunniutaasussat

(tamanut ammasumik tusarniaareernerup kingorna ikkunneqassaaq)

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut inuillu peqqissusaannut sunniuteqassangatinneqanngilaq.

6. Innuttaasunut sunniutaasussat

Siunnersuut innuttaasunut sunniuteqassangatinneqanngilaq.

7. Sunniutaasussat annertuut allat

Siunnersuut annertuunik allanik sunniuteqassangatinneqanngilaq.

Siunnersuut allanik sunniuteqarsinnaanersoq Naalakkersuisut Siulittaasuata Naalakkersuisoqarfiata maannakkorpiaq misissorpaa, ilanngullugit IT atorlugu periaatsinut teknikkikkut sunniutaasussat. Allanik sunniuteqarsinnaanerata paasinarsisinnissaanut, tamanut ammasumik tusarniaaneq ilaatigut iluaqutaassaaq, ilanngullugit teknikkimut tunngasut. Kalaallit Nunaannut nalunaaquttap igiaqatigiiffia aammalu Ittoqqortoormiinit nalunaaquttap ingiaqatigiiffia ukiumut ataasiarluni siuartinneqarlunilu kinguartinneqartarluni, Kalaallit Nunaata 1990-miilli aasaanerani nalunaaquttamik atuisimanera tunngavigalugu, tamaattoqarnissaa naatsorsuutigineqanngilaq.

8. Oqartussanut kattuffinnullu il.il. tusarniaaneq

Siunnersuut piffissami XXX 2022 Naalakkersuisut tusarniaanermut nittartagaanni tamanut ammasumik tusarniaassutigineqarpoq.

Takuuk ilanngussaq 2-mi tusarniaanermut allakkiaq ilanngunneqartoq.

Siunnersuummi aalajangersakkanut ataasiakkaanut nassuiaatit**§ 1-imut**

Imm. 1-imi aalajangersarneqarpoq, Kalaallit Nunaannut nalunaaquttamut malitassaq nalinginnaasooq aamma nalunaaquttat ingerlaqatigiiffiat UTC -2-miiginnassasoq. Ullumikkut taanna UTC -3-miippoq.

Imm. 2-mi, sumiiffiit nalunaaquttap ingiaqatigiiffianik, nalunaaquttap ingiaqatigiiffianit nalinginnaasumit UTC -2-mi allaanerumsumik, malinniffiusussat erseqqinnerumsumik oqaatiginissaannut Naalakkersuisut piginnaatinneqarput. Ullumikkut sumiiffiit pingasut nalinginnaasumit, maannakkorpiaq UTC -3-mit, allaanerumsumik nalunaaquttap ingiaqatigiiffianik atuiffiupput. Sumiiffiit taakkua tassaapput illoqarfik Ittoqqortoormiit, nalunaaquttap ingiaqatigiiffiini UTC -1-mik atuiffiusoq, Danmarkshavn nalunaaquttap ingiaqatigiiffiini UTC +0-mik atuiffiusoq, aammalu Pituffik (Thule Air Base) nalunaaquttap ingiaqatigiiffiini UTC -4-mik atuiffiusoq. Naalakkersuisut taamaalillutik sumiiffinnut taakkununga, tamanna kissaatigineqarpat, immikkut ittumik nalunaaquttap ingiaqatigiiffiini ingerlatitseqqinnissamut piginnaatinneqarput. Nalunaaquttap ingiaqatigiiffiini taakkunani allanngortitsinissaq eqqarsaatigineqanngilaq.

Tamanna kissaatigineqarpat Kalaallit Nunaanni sumiiffinnut allanut immikkut nalunaaquttap ingiaqatigiiffiini atuutsitsilernissamut aamma Naalakkersuisut piginnaatinneqarput.

Imm. 3-mi Naalakkersuisut aasaanerani nalunaaqutaq pillugu maleruagassanik aalajangersaanissamut piginnaatinneqarput. Aasaanerani nalunaaquttap atorineqarnera pillugu Inatsisartut inatsisaat nr. 14 ulloq 19. oktober 1989-imeersumi taamanikkut Namminersornerullutik Oqartussat Kalaallit Nunaanni aasaanerani nalunaaqutaq pillugu maleruagassanik atuutsitsilernissamut piginnaatinneqarput. Piginnaatitsissut taanna siullermeertumik ukioq 1994-imut aasaanerani nalunaaquttap aalajangersarneqarnera pillugu Namminersornerullutik Oqartussat nalunaarutaat nr. 4, 11. marts 1994-meersumi atorineqarpoq. 1994-ip kingorna Kalaallit Nunaanni taamaalilluni aasaanerani nalunaaqutaq atorineqarpoq.

Imm. 3-mi piginnaatitsissummi Kalaallit Nunaanni aasaanerani nalunaaqutaq pillugu maleruagassat atuuttut ingerlateqqinnissaannut periarfissaq, kiisalu tamanna kissaatigineqassappat aasaanerani nalunaaquttap atorunnaarsinnissaa, pineqartunut ilaatinneqarput. Naalakkersuisut isumaqarput Kalaallit Nunaanni aasaanerani nalunaaqutaq, EU-p tamanna atorunnaarsippagu, aatsaat atorunnaarsinneqassasoq.

§ 2-mut

Imm. 1-imi aalajangersarneqarpoq, Inatsisartut inatsisaat ulloq 1. januar 2023 atuutilissasoq. Kalaallit Nunaannut nalunaaquttap ingiaqatigiiffiini inissisimaneq nalinginnaasoq UTC -3-miit UTC -2-mut ulloq 1. januar 2023 allanngortinneqassaaq.

Imm. 2-mi aalajangersarneqarpoq, aasaanerani nalunaaquttap atorneqarnera pillugu Inatsisartut inatsisaat nr. 14 ulloq 19. oktober 1989-imeersoq ulloq 1. januar 2023 atorunnaarsinneqassasoq. Sunniutaasumik allanngortitsineq tassani pineqarpoq, pissutigalugu aasaanerani nalunaaqutaq pillugu maleruagassanik aalajangersaanissamut inatsimmi tunngavissaq Inatsisartut inatsisaannut matumunnga nuunneqarmat.

Ilanngussaq 1**Suliassa qarfiup ”Nalunaaquttap aalajangersarneqarnera” akisussaaffigilerlugu tiguneqarnissaa pillugu Naalakkersuisut aamma danskit naalakkersuisuisa akornanni isumaqatigiissut**

Aasaanerani nalunaaqutaq pillugu Kalaallit Nunaannut inatsimmi nr. 817, 19. december 1989-imi, Namminersornerullutik Oqartussat Kalaallit Nunaanni aasaanerani nalunaaquttap atuutsilernissaanut pisinnaatitaaffik tiguaat. Nalinginnaasumik nalunaaquttamut malitassanik aalajangersaasarneq, Nalunaaquttap aalajangersarneqarnera pillugu inatsimmi nr. 83, 29. marts 1893-imeersumi aalajangersarneqartoq, tigusinermi pineqartunut ilaatinneqanngilaq.

Ullumikkut Kalaallit Nunaannut nalunaaquttap aalajangersarneqarnera pillugu aalajangersakkanik inatsimmi aalajangersaasoqarsimanngilaq. Suliassa qarfik taamatuttaaq Kalaallit Nunaanni Namminersorneq pillugu inatsimmut (Namminersorneq pillugu inatsit) ilanngussami taaneqanngilaq. Suliassa qarfik Namminersorneq pillugu inatsimmut ilanngussami taaneqarsimatinnagu, Namminersorneq pillugu inatsimmi akisussaaffigilerlugu tigusinissamut periaasissaq manna aalajangersarneqarpoq:

” § 4. Naalakkersuisut aamma Danmarkimi naalakkersuisut isumaqatigiissutigisinnaavaat suliassa qarfiit Kalaallit Nunaannuinnaq tunngasut ilanngussamili taaneqanngitsut Kalaallit Nunaanni Namminersorlutik Oqartussanit tiguneqarsinnaasut.”

Taamaattumik suliassa qarfiup ”Nalunaaquttap aalajangersarneqarnera” Kalaallit Nunaanni Namminersorlutik Oqartussanit akisussaaffigilerlugu tiguneqarnissaa pillugu Naalakkersuisut aamma danskit naalakkersuisuisa akornanni isumaqatigiissuteqartoqarpoq. Suliassa qarfik pillugu Inatsisartut inatsisissaannut siunnersuutip Inatsisartuni akuerineqarnissaa, akisussaaffigilerlugu tigusinissamut piumasaqaataavoq.

Suliassa qarfik ”Nalunaaquttap aalajangersarneqarnera” tamatuma kingorna tamatumunnga Inatsisartut inatsisissaannut siunnersuutip atuutilernerata peqatigisaanik, Kalaallit Nunaanni Namminersorlutik Oqartussanut tunniunneqassaaq.

Múte Bourup Egede (sign.)
Naalakkersuisut Siulittaasuut

Trine Bramsen (sign.)
Transportminister